

敷榮妻 何氏 陳氏 莫氏 甯廖氏存泰妻 黎曹氏作儀長媳 張容氏仕信妻 李覃氏立文妻 李方氏立文媳 黃滕氏廷鍾妻 黃韋氏煥章妻 滕孫氏國集妻 黃玉氏憲利妻 黃王氏憲球妻 謝麥氏孔高妻 謝蒙氏蘭珍妻 謝周氏蘭登妻 謝林氏聖綱妻 謝蘇氏聖瑞妻 謝檀氏崇山妻 袁蒙氏世瓊妻 袁黃氏世雍妻 陳梁氏國泰妻 鍾潘氏毓仁妻 黃陸氏廼坤妻 伍盧氏士番（王旁）妻 羅利氏輕惠妻 廖黎氏 譚伍氏 甯姚氏周南妻 朱陸氏文基妻 楊羅氏仁厚妻 楊陳氏日怡妻 楊黃氏枝長妻 楊張氏枝沛妻 陳蘇氏 王張氏芳士妻 鄧黃氏興淳妻 馬余氏進安妻 以上女五代同堂妻 勞陳氏訓導自榮妻旌建貞壽坊 黃李氏善邑妻 黃劉氏朝養妻 黃梁氏克所妻 覃謝氏朝亮妻 以上百歲以上

按耆壽不載婦女緣前志五代同堂並載男女故各處紛紛開列茲仍列女五代同堂及百歲以上兩項餘概不錄（續志）

靈山正續志卷十六人物志

傳類上 鄉賢 人材 文學 武功 鄉賢

靈山縣志

人物志

式百壹拾

廣州黃黎巷新中華承印

按舊志列傳以鄉賢統史傳人材諸目範圍汎濫且與崇祀鄉賢祠者無別茲就現崇祀諸先哲立鄉賢傳以史傳之姜公輔甯原悌黃渙隸之而以黃叔達改隸人材而刪史傳一門以免駢枝焉（續志）

唐

甯原悌廉州刺史純從孫也少好學武后永昌元年舉進士以賢良策試於廷時對策者千餘人詔吏部尚書李景諶糊名校覆后親擢張柬之第一原悌第九原悌出荒服得上第朝野咸異之授校書郎累官諫議大夫睿宗景雲二年以西城隆昌公主爲女冠以資天皇太后冥福原悌上言先朝公主驕盈及禍抑損獲全釋道以清淨爲本不當廣營寺觀勞人費財今二公主入道將爲之置觀奈何過爲崇麗取謗四方又先朝所狎諸僧尚在左右宜加屏斥上覽而善之元宗朝復以諫議兼修國史元宗取所修史閱之見直書隱巢事不憚因諭曰白馬求卿黃金贖罪以爲如何原悌叩首曰周公誅管蔡季友鳩叔牙雖太宗不得已之誅亦隱巢有以自取爾由是忤旨去官卒葬於大墓山詔發五府兵以給葬事立祠於上蒙村今靈邑狼濟山有石室乃原悌讀書之所

按欽州靈山皆有甯諫議廟鄉儼則處處祝祀之其子姓散處於欽州者亦最繁詢

之亦無宗圖可攷然以狼濟石室相距十里有甯家村前有甯母井又鄉人往往掘得先朝器物則諫議之故里當近於是無疑矣

姜公輔愛州日南人第進士補校書郎以制策異等授右拾遺爲翰林學士歲滿當遷上書以母老賴祿而養求兼京兆戶曹參軍事公輔有高才每進見敷奏詳亮德宗器之朱滔助田悅也以蜜裏書問道邀泚太原馬燧獲之泚不知也召還京師公輔諫曰陛下若不能坦懷待之不如誅之養虎無自貽害不從俄而涇師亂帝自苑門出公輔叩馬諫曰泚嘗帥涇原得士心向以滔叛奪之兵居常怫鬱不自抑請馳騎捕取以從無為羣兇得之帝倉卒不及聽既行欲駐鳳翔倚張鎰公輔曰鎰雖信臣然文吏也所領皆朱泚部曲漁陽突騎泚若立涇軍且有變非萬全策也帝亦記桑道茂言遂之奉天不數日鳳翔果亂殺鎰帝在奉天有言泚反者請爲守備盧杞曰泚忠正篤實奈何言其叛傷大臣心請百口保之帝知羣臣多勸泚奉迎乘輿者乃詔諸道兵距城一舍止公輔曰王者不嚴羽衛無以重威靈今禁旅單寡而士馬處外爲陛下危之帝曰善悉內諸軍泚兵果至如言乃擢公輔諫議大夫同中書門下平章事帝徙梁唐安公主道薨主性仁孝許下嫁韋宥以播遷未克也帝悼之甚詔厚其塋公輔諫曰即平賊主必歸塋今行道宜從儉以濟軍興帝怒謂翰林學士陸贄曰唐安之塋不欲事塋壟令

靈山縣志

人物志

式百拾壹

廣州黃黎巷新中華承印

累甓爲浮圖費甚寡約不容宰相關預苟欲指朕過爾贄曰公輔官諫議職宰相獻替固其分本立輔臣朝夕納誨微而弼之乃其所也帝曰不然朕以公輔才不足以相而又自求解朕既許之內知且罷故賣直售名爾遂下遷太子左庶子以母喪解復爲右庶子久不遷陸贄爲公輔數求官贄密謂曰竇丞相嘗言爲公擬官屢矣上輒不悅公輔懼請爲道士未報它日又言之帝問故公輔隱贄言以參語對帝怒黜公輔泉州別駕遣使齎詔讓參順宗立拜吉州刺史未就官卒憲宗時贈禮部尚書（錄唐書）

附舊唐書姜公輔列傳

姜公輔不知何許人登進士第爲校書郎應制策科高等授左拾遺召入翰林爲學士歲滿當改官公輔上書自陳以母老家貧以府椽俸給稍優乃求兼京兆尹戶曹參軍特承恩顧才高有器識每對見言事德宗多從之建中四年十月涇師犯闕德宗倉皇自苑北便門出幸公輔馬前諫曰朱泚常爲涇原得士心昨以朱滔叛坐奪兵權泚常憂憤不得志不如使人捕之使陪鑾駕忽羣兇立之必貽國患臣頃曾陳奏陛下苟不能坦懷待之則殺之養獸自貽其患悔且無益德宗曰已無及矣從幸至奉天拜諫議大夫俄以本官同中書門下平章事從幸山南車駕云至城固縣唐安公主薨上之長女昭德皇后所生性聰敏仁孝上所鍾愛初詔尙韋宥未克禮會而遇播遷及薨上悲

悼尤甚詔所司厚其葬禮公輔諫曰非久克復京城公主必須歸葬今於行路且宜儉薄以濟軍士德宗怒謂翰林學士陸贄曰唐安天亡不欲於此爲塋壟宜令造一磚塔安置功費甚微不合關宰相論列姜公輔忽進表章都無道理但欲指朕過失擬自取名朕比擢拔爲腹心乃負朕如此對曰公輔官是諫議職居宰衡獻替固其職分本立輔臣置之左右朝夕納誨意在防微微而弼之乃其所也陛下以造塔役費微小非宰相所論之事但論理之是非豈論事之大小若造塔爲是役雖大而作之何傷若造塔爲非費雖小而言者何罪帝又曰卿未會朕意朕以公輔才行共宰相都不相當在奉天時已欲罷免後因公輔辭去朕已面許尋屬懷光背叛遂且因循容至山南公輔知朕擬改官所以固論造塔實直取名據此用心豈是良善朕所以惆悵者只緣如此贄再三救護帝怒不已乃罷爲左庶子尋丁母憂服闋授右庶子久之不遷洎陸贄知政事以有翰林之舊數告贄求官贄密謂公輔曰余當見下（林旁）州寶相言爲公奏擬數矣上旨不允有怒公之言公輔恐懼上疏乞罷官爲道士久之未報後又庭奏德宗問其故公輔不敢洩贄便以參言爲對帝怒貶公輔爲泉州別駕又遣中使齎詔責寶參順宗即位起爲吉州刺史尋卒憲宗朝贈禮部尙書

靈山縣志

人物志

式百拾式

廣州黃黎巷新中華承印

駕復起爲吉州刺史未就官卒蓋尙在泉州也今郡志及通志所載姜墓雖無可確証然亦附誌於冢墓門中以存疑也唯新唐書誤稱愛州日南人則詳辨之以俟時賢之考証云

謹按舊郡邑志皆云姜神翊爲欽州參軍始貫遵化其子挺生公輔遷日南一似公輔再遷乃至日南者蓋加遷日南三字欲以合唐書愛州日南人之文不知遵化即漢之日南地也唐書雖知公輔之爲日南人而不知爲漢之日南郡地人非唐之愛州日南縣地人也查太平寰宇記嶺南道載愛州註云即九真郡領九真縣秦象郡地漢武帝置九真郡後漢至宋齊因之梁置愛州隋爲九真郡唐武德五年復爲愛州領九真松源楊山安順四縣九年廢松源入九真又廢真州以胥浦軍安日南移風四縣屬愛州由是愛州始有日南縣縣卽漢居風地又卽吳改爲移風地此唐之愛州之日南縣也然唐之日南縣固非盡古日南郡地即唐之日南郡亦非盡古日南郡地如隋書之九真郡統縣七既有日南縣而同時別有日南郡統縣八者是也夫使姜平章果爲愛州之日南人則新唐書自宋子京手成之明去未遠郡縣諸志何以竟指爲遵化縣人且以吾靈僻陋諸故老必無從知愛州日南之人而忽指爲遵化之人而又以某山某水指爲其人之居遊者雖今里居冢墓亦難盡據而要其爲唐之遵化縣人可知既知其

爲遵化縣人則愛州二字必誤而日南二字特沿於遵化爲古日南郡地而誤以唐之日南縣當之耳又按唐書致誤之故一由於唐代之郡縣屢更屬隸靡常蓋遵化始置自隋及唐因之未幾析內亭遵化二縣爲南亭州又析海安置玉山州上元二年復析玉山州更名陸州屬安南都護府調露元年隸容管乾元元年隸邕管前後九十年間更番互屬此其易誤一也一由古今手札好書古地名計平章登第以至入相歷年無多遵化之名又不甚著或稽其手札曾書日南而遂誤認爲唐之日南縣人如今邑人多書南賓亦類於此此其易誤二也一由於謄寫之訛查陸州即遵化所析之地陸州之廢距平章登第時未遠或出身尙係陸州而草書之陸作 騰者誤寫作 又聞平章係日南人遂以愛州日南當之此其易誤三也所誤雖難確詳然遵化之有陸州地皆爲漢之日南地固可決耳

又謹按愛州之誤旣爲陸州則縣中之陸屋墟當由陸州得名如縣中之舊州墟以欽州舊治得名也予詳觀陸屋之脉發源於雞籠山蜿蜒三十餘里垂盡處左有欽江右一有舊州江交會而西南流至欽而入於海亦古稱一都會者舊志欽江在陸屋墟蓋屢建州縣之所故今之墟在縣中亦最盛以此推之則故老相傳以秋風練之大平里爲

靈山縣志

人物志

式百拾叁

廣州黃黎巷新中華承印

平章故居以古竇嶺銅魚山爲平章讀書堂柱礎猶存以秋風練之那檣爲平章墓所皆非無因也太平里距陸屋四十餘里銅魚山與那檣距大平里亦如之此可知陸州地入遵化之由而愛州之誤見矣至遵化爲漢日南地詳見疆域沿革條中

宋

黃渙字彥舟力學通經史百家慷慨重氣節元符三年鄉薦崇寧間授定州文學上書論天文政和七年陞通直郎權知梧州軍事宣和五年以選次赴京會金人入寇渙率在部官奔南薰門上表留駕己而奔南京奉表勸進高宗壯其志擢兵部侍郎建炎三年與虜戰歿贈朝奉大夫秘閣修撰官其一子

按渙事見一統志今從府志縣志錄之

明

梁夢鼎字道立資稟穎異理學淵深以壁經名世邑中士多宗之中隆慶丁卯鄉試屢上春闈不第因親老就職華亭教操作尙潔雅慕圖書且諄諄以躬行心得爲弟子範時徐存齋陸平泉二名公有世稱楊伯起之贈及陞大庾令諸士立石以思至任裁抑羨餘百姓親愛丁母艱遂不仕

石維海字宗源操行端方爲鄉里所推嘉靖間由歲貢授桂林府經歷有撫狼功擢隆安縣令躬行教化民皆樂從時有土司爭田因而搆亂維海受檄平之建學宮賑饑民

悉出已俸泊歸行李蕭然

按舊邑志有孝友嗜學端方仁厚致政歸謝絕公門等句並附祿之

柳稠號海峯家貧好學善事異母之兄領鄉薦任永新縣丞清操可矢天日直指爲之行賞褒嘉後耽山水歸隱林泉陶陶然與物無競屢飲於鄉爲邑人望

按通志舊列孝友

檀昭貢生有勇略景泰間郡邑盜賊四起昭編鄉人爲什五以相守望知府饒秉鑑嘉其義付以民兵昭率衆與賊大小二十餘戰皆捷所馘六百有奇後廣西龍山賊攻沒城池衆皆去昭遂力戰而死鎮巡咸遣官致祭士大夫詩以哀之

莫如勤少勵志苦學常登石六峯得巖洞峻絕人跡不到處讀書其中以繩垂竹器山下家日買鹽米器中給之嘉靖十二年以國子生家居有賊踰城劫庫殺百戶邵經及民兵七人斬長春門而出如勤遣其子汝賢潛尾其後自領軍快隨之至永淳縣下南鄉獲賊杜得勝等五人送海北道鞫出賊首嚴景朝等十餘人解軍門斬之如勤以捕賊功授平和知縣綽有政聲歸日家無餘貲其子先卒無嗣人皆哀之

以上舊志
人材

靈山縣志

人物志

式百拾四

廣州黃黎巷新中華承印

史無人材專傳以其見於史者皆材也茲何以人材標目也曰方志之有人物統言之也變人物而言人材謂其以材見也此殆如宋書齊書有孝義列傳魏書則分爲孝行列傳節義列傳矣乎亦各指之云爾〔舊志〕

唐

甯純字如和欽州人南海以西溪洞自漢晉來甯族最大世爲酋帥蠻獠皆歸之純少警敏通章句頗善書文宣甚愛之伯父猛力陳正明時爲安州刺史僂僵不實服令宣治大廉峒而自居欽江隋高祖平陳遣員外散騎侍郎何稠往嶺表撫交趾因諭猛力入朝會猛力病劇謂稠曰我死當遣子長真入侍其後長真歸隋拜鴻臚卿而留宣爲合浦太守武德初長真與宣皆以地降詔授長真欽州都督宣卒以純爲廉州刺史純善撫衆招徠蔡龍洞民闢其四境請立爲縣已而徙刺合州族子道明代刺越州爲高州首領馮暄所陷純舉兵擊退之貞觀初長真與暄皆卒而宣〔日旁〕弟盎叛屢欲攻純純閉境自守唐遣中庶子張元素往鎮撫及見純謹厚有禮以詩書教其宗人蠻俗向化甚稱獎之卒於官

按甯純舊邑志不載今據府志及欽州志錄之攷傳既稱自處於欽江則純當爲欽江人靈既有欽江地則純自宜編入靈山矣又攷唐自武德五年析內亭遵化二縣

置南亭州如和縣則純之字如和當以其地稱之如張曲江姜日南之義云爾
姜神翊字祐之欽州遵化人其先自天水徙南海至神翊爲欽州參軍始貫遵化累遷
舒州刺史修皖山祠建四望樓令行政肅淮南盜賊不敢入其境子挺以父任爲盛唐
令挺生公輔爲名卿相

查神翊舊志入人物嘉慶志以其爲欽州叅軍改入宦蹟謹按唐之欽州雖在靈界
無績可紀故府志欽志皆入人物今從之（續志）

宋

黃叔達字公濟有風節以薦辟補正額攝管隨軍攻破交趾玉山寨克復廣源等五州
以功轉承議郎子五人濤渙沉漸洌濤沉終太學生餘俱歷官渙最知名

明

王朝恪字以載由歲貢嘉靖三十六年授雲南大理府經歷委署府州縣篆者三悉能
撫復逃移革盡奸弊至清田却金於鄧州民立生祠以祀歷任九載浩然而歸諸士大
夫作詩以華其行

按清田却金於鄧州當從府志作鄧川州州今仍屬大理府也又按恪字以載當從
選舉府志作朝輅

靈山縣志

人物志

式百拾伍

廣州黃黎巷新中華承印

邵新字允明少好學博達不凡嘉靖年間出貢授上杭縣丞當官簡易公平政和民戴
未三載遷後軍都督府經歷到任三月告休而歸絕跡公庭詩書垂訓正直率人鄉鄰
親睦人咸思慕之壽八十三

清

張所受字斐文號樸齋文學琮次子由附貢生循例捐知縣分發福建補永定縣至任
未三月清釐積案三千餘牘抉奸摘伏如神時稱爲掃案名家調任南靖詔安諸羅各
縣其俗故好械鬪爲密殲其魁人遂帖然署臺灣淡水同知委征生番陞理番同知委
征黃教皆督鄉勇兵壯分路設伏搗其巢穴累陞至陝西延安府知府調鳳翔府爲革
除里馬之役修復東坡之廟勤勸書院之課民今頌之

仇汝瑚字碩夫號序東監生循例授按察司經歷補缺後以治河功升補孟縣知縣甫
下車延名師訓課創建花封書院築景韓堂重修孟縣志皆先事其大者任鄭州役尤
衝繁民鮮寧息爲做古田賦之制編里標號號有符合按號出車車無重擾週而復始
胥吏無所假手鄭民德之楚北白蓮匪起竄入河南守唐縣之湖河鎮四十餘日嚴寒
不少懈又以寨兵五百當賊數千抵禦益堅賊退分兵三路擊之豫境以安又辦理河
工總局絲毫無所染指以卓薦陞江西廣信府知府五年以疾去卒於省寓

此節採馮翰林敏昌作仇孟晟府君墓表及邱比部先德作仇汝瑚府君家傳又本崔繡鄭州治行記並採之

以上舊志

仇效忠字蓋之號典堂西鄉官堂村人幼負奇氣十四歲作駢體文寓志族里錄爲座右銘令子弟日誦之十八歲遊庠即以高等食餼登嘉慶丁卯賢書考允覺羅教習道光丙戌會試中式入詞垣散館改授貴州貴定知縣初蒞任修縣志建書院調湄潭縣民俗好訟爲剔除奸弊政簡刑清政聲大著陞松桃同知以卓異擢興義府尋丁外艱歸服闋復補前缺調守石阡署懷仁官聲益著黔省原爲苗疆素稱難治公所至民苗帖服案牘躬親在署迎養每退食必問安不因冗廢而待士尤優丁內艱歸歷掌南海之西湖惠州之豐湖東莞之寶安省垣之越華各書院講席卒於越華書院享年七十有二

謝振武字鷹揚檀墟練大塘派武生六歲喪父孝母友兄鄉里稱之咸豐四年西匪擾邑鄙總辦團練籌費募勇公先捐經費二百餘貫爲倡乃募團堵禦隨廖將軍勦賊擒殺二十餘名五年復籌費帶勇隨沈府保頤越橫州勦匪亦捐經費五百貫爲倡保加千總銜七年西匪陷城總辦仙嶺局團練捐經費千五百貫爲倡廉州府呂詳以千總

靈山縣志

人物志

式百拾陸

廣州黃黎巷新中華承印

入營儘先拔補同治四年賞戴藍翎壽八十歲親見五代同堂

按謝君事實兼孝友好義武功本末並賅故採入人材傳焉

謝振邦字達軒石背練長安村庠生性深厚而遇事明決咸豐七年西匪陷城廖叅將秦遊戎以糧匱撤兵路經那隆公力任軍梁請留克復之功公爲先河城既復投筆從大府入潯以功保教職晉省考驗援復城例請于大憲靈邑獲加廣額學二名公之力也尋奉檄署韶府教授未幾假歸同治十一年亂民劉賢糾衆劫邑署逃至雙板橋公督勇擒解正法復調署仁化教諭不就職壽七十七歲子三長煥章增貢生官知縣另有傳次鑾章廩貢生加捐教諭性坦易待人以誠里有爭者得其一言無不悅服次雲章庠生（據廣西舉人劉啟正舉人鍾榮輝翰林林鑑中壽序採輯）

謝煥章字文亭振邦長子由增貢生援例府經歷分發廣西從軍入黔積功保知縣加同知銜留原省儘先補用歷融縣天保縣其署融縣也弭齋匪育人材融民頌之迨署天保縣縣本土司改流未久內則土酋把持訟案蠹吏狼胥隱匿混冒外則土匪勾結遊勇出沒山崗公鋤豪強勤緝捕清案牘謹催科設學田全邑大治大府以公精幹委兼奉議州丁內艱回籍時邑方多故邑令鄧倬堂委辦局務多所維持未幾復丁外艱服闋未久卒于家（據廣西舉人鍾榮輝墓志採入）

黃振之字玉堂上東練廩貢生光緒中土匪擾亂督團勇擒首匪葉其福莫二黃載興水飛四等地方賴安三十三年土匪撲城窺茅金方公倡團同官軍解圍勦散邑令劉墩以公功轉詳賞五品軍職

文學

文學之有傳本之於儒林文苑也按漢書但稱儒林後漢書乃稱爲文苑後史多因之梁書隋書乃標爲文學唐書又稱文藝宋史另標爲道學而黨禁遂起矣現國史編纂儒林文苑史臣自其區別方志一隅似宜以文學起例云（舊志）

明

錢象乾正德間貢任福建長泰學司訓持身謹厚蒞事勤敏與諸生探討本源咸獲其益捐俸以助學工而親督之時謂學校以新人文以振者皆乾之力也列地泰名宦梁夢日字繼湖自少穎悟絕人博綜羣籍天文地理命卜書算兼通領萬歷年間鄉薦官安吉州判宅心寬恕有長者風民咸愛之致政而歸恂恂里社中絕無貴人熊匍匐救鄰公門屏跡饒有仙風鄉評重之

紀通字守塞號豫一居平南松柏山之麓生而神靈精皇極經世之數事二親盡孝由貢授陸川司訓閉齋讀易每言奇中己而掛冠東歸修其墻屋教授弟子屢舉大賓不

靈山縣志

人物志

式百拾柒

廣州黃黎巷新中華承印

出所著有松溪集人稱爲南金東箭

清

仇汝昌字拜言號芝峯性質剛方敦崇孝友建祖祠設祀田訓課子弟井然有條仲弟汝瑚歷任守牧有政聲多奉昌訓胞姪惠忠幼失怙撫育如己出迨惠忠署福建南勝分縣製錦遙祝蓋紀德也生平善排解鄉人有訟鬪者一言立釋遇饑捐賑存活甚多戊辰己巳鄉中賊匪猖獗嚴申保甲購線拿獲一鄉無警稟質稍魯而好學不倦爲諸生時有文譽學使李雨村先生刻其試帖於觀海集中甲寅秋試卷出增城縣談公房草榜已定既而不果援例就教歷署海豐教諭陽山訓導諄諄以德行為教多士翕從年七十餘猶訓課童孫手不釋卷卒之日閭里相弔聞者感泣所著有古今體數千首爲上下二帙藏於家

甯孚遠邑廩貢授連山學訓導生平謙謹文行兼優致仕家居屏跡公庭鄉里器重譚有德邑廩貢授西寧學訓導歷署羅定學正及東安西寧兩學教諭淳謹自持動遵禮法致仕家居絕跡公門即鄉鄰亦罕見其面士林見稱

劉作梅貢生家居孝友篤志經學且誘掖後進循循不倦家雖貧晏如也靈士之楚楚者多出其門歷任督學咸器重之

張琮字元玉康熙庚子科舉人靈山自清初戶口始復又阻於邊遠琮以績學力行遂爲科第開先人稱爲開靈先生出爲直隸平谷縣知縣不樂仕而歸子三人俱入仕仲子所受歷官至鳳翔府知府尤知名

王家憲號儀亭少穎悟夜讀文向友人窓外竊聽一過輒識之中乾隆辛未科進士選授河南延津縣知縣縣當孔道令苦奔走不暇憲每出則攜卷宗以從輒就近剖斷之民以不擾民或以酒饌獻憲享少許餘則令民均飼之因問所疾苦殆如家人父子焉任逾年以疾歸一以栽培後學爲任主講西靈書院將十年邑中之翹秀者多成就之存儀亭詩文稿一冊

梁寅字字人統號鍾靈未冠爲王文肅公安國所知自四書經史以迄諸子百家靡不精熟充乾隆辛酉拔貢生後文肅撫粵招至署中肄業學益大進然數奇屢擬中不果居鄉以獎進後學爲事士之窮乏者恤之秀良者勸之晚年手不釋卷所著有學庸貫通考古約編鍾靈山人詩鈔文鈔諸書藏於家

曾維禮歲貢生力學敦行動於訓課乾隆三十年聘修縣志

張國憲字廷簡號石渠子雄之季子也歲貢生性嗜學訓課諸士以理法爲倡修舊州墟約亭爲朔望宣講所選授南雄始興縣訓導卒於官生子六人登庠者四人次子善

靈山縣志

人物志

式百拾捌

廣州黃黎巷新中華承印

文以詩學見知於翁學使方綱是時初用試帖士鮮諳聲律遊善文之門者屢以經古得高等人謂文有定價云充歲貢生未幾卒

徐輔仁歲貢生選授南海學訓導授徒四十餘年造就成材者甚衆而性情和易待人寬恕登其門者咸以爲如坐春風邑人嘗謂靈山有三仁蓋指勞乃仁曹仁及輔仁也譚光昭附貢生力學有文子五人在簡在明在新在獻在棗皆自訓迪設長枕大被共臥起皆先後食餼在簡在明在新爲前康太守茂園所賞士李學使調元歲試一等前三名皆光昭子書譚家珠樹額以寵異之在簡選任河源學教諭在明先光昭卒在新選潮陽學訓導未抵任卒

黃蘭琛字叔寶邑廩生長子朝慶爲康太守所賞士蘭琛試輒冠軍書法摹玉版十三行能具其體屢薦不售從學於合浦之寓齋無疾卒

羅瀚文號海峰乾隆己酉拔貢生由八旗教習報滿以知縣揀發雲南試用丁內外艱歸益困人慕其書索者不絕瀚亦資以自給人稱其書能升顏魯公堂云

韓士達歲貢生原籍潮州來靈授徒既合例始考靈山試遂貫焉性端嚴寡言笑跬步必遵禮法而指畫不倦及其門者類多成材

梁錫號宏軒恩貢生鄉賢夢鼎之後少失怙奉母力學以大其家凡邑中公議多倚錫

一言而決尤留心訓子子四人長著祖次惠祖皆後先中式仁祖燕祖暨孫九魁補弟子員諸孫亦各林立人以爲德量所致選授海康縣教諭任二年以疾歸卒於家（按錫曾一日嫁四婢所獲直悉以付婢亦人所難也）

黃作熹歲貢生品端方力學能文前邑令陳公拔以冠軍後爲學使李雨村所賞熹居邑之豐羅練練近西粵向鮮文士自熹挺出風氣始開遊熹門者咸成宿學今練內絃誦不輟皆熹樹先聲也

以上舊志

張玉璠號寶田舊州練歲貢博覽羣書尤長詩古文生六子長蔡次榮庠生次崇拔貢次維歲貢五勳副貢六舟歲貢榮維勳同考進庠時王（番旁）尙送考學使招至案前道賀稱爲家學淵源一門之盛後榮維以品行著崇勳舟俱以文顯

伍士麒宋泰練廩貢性耽詩酒博學強記以冠軍進庠食餼生平多吟咏尤長古學每試經古必列前茅戴顧二學使皆器重之自束髮受書惜字如命嘗埋字灰十餘瓮作序爲之銘曰易灰故紙難灰故心破塚而出一字千金

邱對顏字金門原籍大埔自先世遷居爲六屋人博覽工詩由瓊州納竹（從造）室吳小姑善填祠著唾絨餘草先生因小姑而有女門生合浦之羅伯瓊羅仲蓮蔡韞玉茂

靈山縣志

人物志

式百拾玖

廣州黃黎巷新中華承印

名之黎三妹欽州之李芳蘭其尤著名者早卒先生以唾絨餘草徵詩諸名士題詠甚多邑人仇詒厚范鎮兩先生均有所贈羅伯瓊愛誦唾絨餘草纂鈔題詞合爲一帙籤題海山仙人詞其外弟羅晉先鐫板傳世先生好游年八十嘗至丁翰元家偕游靈光巖元之弟熙繪綺石圖爲先生尊照復以此徵詩尤多題詠先生著有松寮詩集而柳堂詩話載先生夙究韜鈴又著有粵海鏡要一書海疆阨塞瞭如指掌諸總戎爭延致之惜未獲大用至今徒以詩文傳耳

勞有烈字用休平山練東園村人歲貢生少穎悟有文名善書精醫性情和易生平絕跡公門惟以獎進後學爲事以故登其門者類多成材著有直養齋詩文草三傳合選古文選等書藏於家

范錕字達知城內四方井街人自童試時即有聲庠序性和易而介居城市足跡不履公門時方多難縉紳或籌團防以抒幹濟或竊脂膏以圖自潤先生蕭然無與蟬脫垢濁授徒爲資文史自娛歷掌教西靈書院後學多出門下尤耽於詩詩清腴秀媚饒有劍南風味早歲肄業郡城海門書院爲晏端書賞拔及晏撫粵先生投刺往謁見先生清才不第爲宛（卜旁）惜久之先生自以愧負知己灰心進取以明經就貢職咸豐丁巳之變男女陷賊中者數千先生與焉因說其酋令縱放爲收拾人心計賊從之由是

脫而先生亦乘機以出迄今邑人每談咸豐時事猶德之不置云

仇詒厚字昌五秉性聰穎詞筆宏富年十七游泮咸豐辛酉科拔貢就職儒學選授連州陽山縣教諭同治初鄰匪擾及西鄉公毀家紓難者再梓里賴以維持當事常器重之

仇葆厚字鐵筠宋泰練人以廩生選同治癸酉拔萃科父貫忠幼孤天性純孝母常勉曰爾三歲而孤爾父疾革惟囑爾力學繼書香言猶在耳豈可忘耶貫泣受訓終身恪遵能世其業尤長篆隸楷草書法貫生三子公居長品行端方博通經史居鄉設教多所成就屢掌邑之六峯西靈書院講席晚年倡建顯西書院議添置賓興田產皆經董其事子開達邑附生自達以上七世有聲庠序不愧家學淵源

劉光基字仞山邑增生石背練西岸村人喜讀書手不釋卷自加丹鉛間有所得則筆之字秀而勁草法尤佳文體清真兼工詩著有藜熒齋詩集與梁雲中遠致堂詩集合刻

潘華海字德春歲貢生石塘練洞心村人性柔和喜儉樸爲人師四十餘年未嘗怒責一人著有五經導竅四書文集二冊詩集一冊長子廷幹邑附生能讀父書珍藏遺稟歿後歷經兵燹惜已無存

靈山縣志

人物志

式百貳拾

廣州黃黎巷新中華承印

丁翰熙字芥舟石塘練蘇村人充光緒乙酉科拔貢耿介方直樂於從善所學有務至古人之志嘗與門人論心理曰人當靜坐日開口合耳無所聞手無所持時不能無所思也人自不覺耳蓋其言直從曾子之日省孟子之求放心體驗而出工詩文畫篆隸旁及雕刻之術靡不精究著有閒閒草堂文集制藝詩鈔藝林雕刻錄數種藏於家

武功

史無武功專傳以名將相之規畫不第征戰論功也若乃一邑之士或以防禦擢職或以勦捕遇難其功不有足多哉然所傳亦不盡遇難之臣故不敢從史家忠義之稱而特著武功云（舊志）

清

楊春秀回頭嶺村人明季從軍爲吳三桂牙將勇冠三軍積功陞參軍從征甘陝凱旋以原職乞休

劉相武武生重然諾喜任事匪人林大懋結會滋事武購線擒獲大府上聞賞藍翎補雷州右營千總在任稽查餘匪益力十年又獲會匪陳老鴻記功以守備拔補後以疾乞歸（府志）

以上舊志

盧芳英石塘練漢塘村人性剛方有韜畧妙齡投軍嘉慶年間承調征甘肅賊大獲全勝以功獎授高州化石營把總尋陞化石營城守卒於任

鄭魁春字梅樓上東練古榕村人由附貢就職九品急公好義鄉人舉爲鄉正贈行端表正匾額道光庚戌歲帶團鮮靈城圍嗣由九品加捐府經歷指省四川時在籍守制縣王雙以解圍勞績詳請儘先補用題贈善徵鄉閭額附立長生祿位忠義祠又嘗於舊州練排解大難亦附立長生祿位北帝廟甲寅抵蜀因川東軍功補缺加提舉銜特授甯遠府經歷丙辰調署會理州正堂丁巳以知縣赴京回卒於四川省城

陳之翰城東雲頭嶺村庠生道咸之際盜匪蠡起之翰奉諭舉辦團練督修城外各開道光二十九年賊目秋天猛率黨困城咸豐七年五月西匪李文彩率黨圍城數日之翰皆親率其子修齊督練力守危城保獎千總銜光緒十年辦海防善後出力保獎儘先外委

黃秀德石塘練兆庄村人少年倜儻軀幹偉大道光末土匪蘇三劫該村黎姓德率村人迎敵斃匪二十餘名咸豐初西匪頻仍德帶團百人深得衆心前後衝鋒數十次未嘗失敗克復縣城一役破環秀橋賊寨尤爲出力獎六品軍職且性好義善解紛建雅凝寺修旺井峽路皆其董理壽八十五歲

靈山縣志

人物志

式百壹

廣州黃黎巷新中華承印

潘克修石塘練洞心村人咸豐初充團丁西匪入境數次大小幾百戰無役不從以功授軍職嗣隨知縣甘征勦寨墟城隍各匪與從弟允修爭先陷陣身被數十創尙能斬賊摹旗突圍而出尋因傷重卒於軍

楊智光字睿堂武利練香江村人少負智勇道光末鄰境李士葵之亂首先出身靖變爾後游匪猖獗時來窺伺復辦團率勇拿獲逆酋張克宗屢建奇功地方賴安獎授營用守備

李慶元字五雲平山練沙猷塘村人少業儒屢應童試不售道光季年廣西土匪蔓延邑之石塘豐羅公乃集團名曰倡義勇與石塘互聯敗賊於六屈兆庄追至六答爲賊所困得援勇殺出重圍復鼓勵前進反敗爲功咸豐七年西匪陷城公在圍爲賊所執擁謁其酋酋欲用之公乃詭代爲出城下鄉開諭恩威匪信而縱之並放城內男女數百人公既脫身乃謁鄉紳甯德車借糧帶勇二百來城賊以爲投誠列隊迎之公俟其近出不意大破之遂隸廖參將麾下克燕子嶺月數十戰及參將陣歿軍無統屬糧食亦竭遂散歸故叙功不及焉公既釋戎事復理舊業入邑庠乃於羅陽千歲廟廊設一義勇祠以祀陳亡即其中授徒顏其館曰羅陽書院同治十一年土匪侵陷縣治公時已老猶招集義勇數百人赴難其忠義奮發天性然也

黃瑞清字受芳號菊園上東練人重義好施志氣慷慨道光末年盜賊蜂起公督率團勇與賊接戰勦捕數月盜風寢息二十九年首匪秋天猛織布黃圍邑城楊總兵檄公赴援內外夾攻賊遂窳北追至平山擒拿首匪秋天猛三十年匪首李士葵四擾鄉村公復會官兵勦捕戰於太平墟敗之圍之於六梧村親自督隊被彈傷數次終不退卒破其巢穴擒匪首解赴彭道台正法賞給六品軍職後知府沈以公蕩平羣寇功轉詳獎五品藍翎

黃河清瑞清胞兄道光末年匪亂指困募勇與弟瑞清勦擒秋天猛李士葵等匪首蒙獎同知銜咸豐復城之役隨廖參將分途進攻兩月戰功頗著

蘇裕檀墟練塘寮村人道光三十年匪首鍾亞春到檀墟打單裕時已七十率子姪團丁拒之斃傷匪各十餘匪復大至裕因械斷斃命姪肇堂肇官雇工劉三上前救護皆斃季子肇昌隨匪戰至佛子墟遇官軍敗北攏其馬頭曰勿走蘇某父兄之仇不共載天誓除滅賊匪首諗肇昌欲得甘心納錢四百貫償四命昌以無助痛哭收隊而退

韋運雖字陸庭中寧練屯統村人少負英氣磊落不羈由武生積功保千總道光戊申署防江南潞流聞汛務時盜賊充斥漕運梗塞雖左摧右廓運道乃通隨福將軍克復揚州各屬陞用守備分統各營咸豐甲寅三月力戰廬州城下陣亡賜雲騎尉世職加

靈山縣志

人物志

式百貳式

廣州黃黎巷新中華承印

予恩騎尉世襲罔替

王大倫字五卿原籍武利練安金村人大倫貴後始遷郡城十歲失恃事父能得歡心友愛兄弟族里稱之初業儒值盜賊蠡起鄉團多起自衛公投筆請于父父壯而許之遂棄儒習武咸豐元年勦賊於沙河地面生獲賊首廉境以安隨赴信宜協勦凌十八賊衆萬餘八閱月經百餘戰擒賊目何名科餘黨殲除殆盡捷聞賞戴花翎後隨督辦馮子材征戰歷保至副將留粵儘先補用同治元年任陸提右營遊擊剔除營弊軍政肅然七年署羅定協副將光緒元年檄回原任六年調補潮州鎮右營遊擊未赴任七年俸滿例應部驗公卸任請假省墓以九年三月終於郡城年六十七子三長光鑑次雲光三用賓

仇俸厚號廉甫敏忠次子咸豐之亂籌餉督練以功保太常寺典簿加同知銜鄉人舉充鄉正秉公辦事隨鄭提督紹忠辦匪尤出力經彙保交部議叙在籍候選後因公積勞疾卒

張永豐附貢生咸豐七年邑城失守越日永豐承廖參將達章面諭招奮勇一百名自備口糧隨同進勦後以勇敢特調掌大營大砲隊城既復乃拔隊歸當事亦以公不居功只詳獎五品軍職

廬奕盛上東練六局塘人咸豐間隨知縣甘槐勦破廣西新安匪巢戰功甚偉獎八品軍功

楊青山字紫雲林墟屬楊屋村人幼讀書知大義投筆從南甯軍以功獎七品咸豐二年復充本省常勝勇破羅定羅鏡賊巢三年調隸西省提標轉戰桂湘鄂歷贛皖浙四年破鍾山解金壇圍復江浦漂水鎮江八年復揚州儀徵積功賞換花翎補四川都司未赴任九年委回粵募勇守鎮江十年敵十餘萬圍鎮江鏖戰七晝夜圍乃解克勾容丹陽越年克丹徒仍回守京口同治元年以肅清功授肇慶副將三年以積功彙保賞道勇巴圖魯交軍機遇缺簡放總兵加提督銜凱撤回粵赴副將任四年督辦東江匪案七年授潮州總兵晉京召見垂詢戰績賜曼桃盤肉充食調高州鎮十一年督修大黃潭炮台光緒元年署赤溪副將二年告假回籍十一年赴省銷假疾卒公寓計從戎十餘年大小數百戰復名城十數屢賜獎武金牌迨任鎮協緝盜寧海功業尤爲昭著云刁士樞字省齊邑陸屋人由武童隨勦土賊尋隨桂軍轉戰湘鄂皖浙積功歷任四川守備貴州大定都司撫標遊擊同治元年彙保以副將用記名總兵署貴州同仁副將封武顯將軍光緒元年署貴州都司副將五年引見賜胡松額巴圖魯授貴州中衛參府數年解官歸卒於家

靈山縣志

人物志

式百式叁

廣州黃黎巷新中華承印

甯啓恭字寅清官屯練洲塘村人少儻有大志業儒不售捐府經歷職銜咸豐丁巳西匪陷城廖參將秦遊府方出師堵勦旋以餉匱欲退邑人廼聯立隨營公局捐助軍需舉公總持局務公入而唱籌出而借箸悉協機宜爲當道所器縣城克復保廣西試用府經歷賞戴藍翎同治間督練隨粵西軍協勦永淳賊保加州同陞用府同知誥授朝議大夫靈山加廣文武生員學額蓋旌越境討賊功也

劉潤新字歲華官屯練排嶺村人咸豐初從戎廣西退敵數萬克復百色龐城以首功保舉賞藍翎拔補都司署理右江鎮標左營都司留守百色乙卯陣亡人祀忠義祠賞騎尉世職

黃大業字隆心上東練古榕村人從九職銜慷慨明義恒爲人排難解紛咸豐初西匪佔據烟墩業傾家倡辦團練協同廖參將營兩次克復咸與有力焉土賊李自揆聚衆起亂設法解散脅從擒拿首要閭里以安

李士翰字苑圃舊州練獅子嶺村人捐職州同少貧窶以勤儉起家身擁厚資咸豐間西匪擾亂創出經費與同族人秀林奐諸人設局籌軍需募團練每與賊戰激勵鄉勇親自督陣所向克捷賊不敢入境桑梓賴安性剛直鄉族有赴訴者先以理喻之強梗者以勢禁之人咸服從壽八十六歲

丁翰邦字安伯石塘蘇村人州同職銜咸同間練內遭李七陳開黃三之亂時局董劉家俊舉辦團練邦每事助之性好勇誓立武功親率丁壯每戰輒身先陷陣並越勦寨墟城隍各匪勞績卓著從弟拔貢翰熙所上壽文有云入而陳魚腹之浦出而屯鹿頭之關身經百戰福將曾無損傷力護一鄉鄰封猶憑捍衛皆實錄也與劉同爲亂世干城鄉閭咸倚賴焉

廖超鶚字秋浦舊州練榕樹塘人有權畧決事如流咸豐間辦團練籌餉隨征以復城功保知縣賞藍翎加提舉銜分發河南候補未赴卒

楊棠芳石塘練石山村人少好武讀書塘校村之觀德軒軒外即百合樂民通衢時土賊蘇三踞百合不時往來一日聞蘇過門前即携軍器欲出刺之爲師友勸止由此遂廢學其天性惡賊然也李七陳開黃三之亂所立戰功不勝枚舉至今猶膾炙人口

潘強修字明德石塘練洞心村人城實而廉管理團務財政二十年毫無所苟以軍功蒙獎千總補用分府當西匪亂時與從弟允修深爲廖參將所重允修性梗直身冒矢石者百十次克復縣城一役手擒要匪蘇亞生亦獲獎千總現年七十九歲精力尙健李培仁上寧練屯佃村人有勇略兼習拳術咸豐丙辰匪首顏品瑤再結巢於宣化之那曲村培仁率團隨知縣甘槐破之孫匪入境培仁又隨團董李體仁等保衛三寧所

靈山縣志

人物志

式百肆

廣州黃黎巷新中華承印

戰皆克同治癸亥年孫匪圍攻鬻朋村培仁赴敵被炮傷左股不能行走然猶扶創手刃四賊賊以炮遙擊斃之

黃現宗字光祖石塘練塘校村武生少富家資咸豐間練內土匪蘇三被團擊斃後其妾率黨報仇與團丁相遇於老虎頭嶺下爲匪所敗時洞心局聞耗失措坐中潘茂材廷節憤起激勵宗即持械大呼而出武生羅贊揚隨之二人爭趨迎敵當者輒倒衆復向前卒能轉敗爲功迨李七陳開等匪臨境宗亦常親冒矢石而秀靈一團之糧食尤多賴宗及其弟現琦之輸將焉保獎千總銜壽六十五歲

陸步瀛字仙舫上寧練仁里村人由恩貢選用直州判家資巨萬才識兼優富永淳孫匪擾亂三寧時被脅者十之八九瀛不顧艱險率團與戰將團丁組織成隊分地巡守號曰常軍又獨力捐餉添募若干卒殲巨寇知縣馮詢到境安撫隨營辦事能以明敏果斷辨是非爲所重事竣稟獎府經歷同治甲戌鄭提督按辦善後加獎六品軍職並以三寧保障四字旌其門生三子次元鼎附貢生歷年勦辦會匪相機變卓有父風韋運亨字泰階中寧練屯統村人由附生捐貢英姿颯爽素有安靖地方之志周榮宗管帶到三寧勦孫仁廣時率團勇百餘爲先導與仁廣遇於那連墟磻磴村親身陷陣周繼之大獲全勝追逐至那路墟敵勢以絀及鄭提督按臨清鄉拿辦逸匪數百合練

攝公之威十餘年無一匪迹知府鹿傳霖獎府經歷加七品銜光緒戊戌土匪黎履芳倡亂公立稟請當道發兵進勦既而合浦縣鄧倬堂縣主葉士模同時帶兵至由已所開典店撥出銅錢三千貫以濟兵食並竭力勦贊軍務遂破黎匪緣是積勞過甚舊病復發隨率於那樓三寧書院西鄉司馮痛其爲地方盡瘁也贈以三寧第一輓詞生子長景正署防城縣訓導次景直丁酉科拔貢

楊喜清字伯明武利練麻定江村監生光緒辛丑土匪鄧東良翁光佳擾亂地方村鄉咸被脅服惟喜清誓不從賊督帶團練拿獲多名翌年駐營昇平墟匪黨假扮官軍混入市中放火相持數日竟以兵單援絕力竭被焚而斃部下同死者二百餘人鄉人在該墟刲建忠義祠祀焉

張廷材字覲堂舊州練廩生頗有文名屢試不第科舉旣廢遂投筆從戎參宋分統安樞軍幕光緒三十二年保舉管帶征勦土匪三十三年邑城被圍帶勇赴援陣亡

以上據各採訪冊續志

靈山正續志卷十七人物志

傳類中 孝友 好義 卓行 曠達 孝友

靈山縣志

人物志

式百式伍

廣州黃黎巷新中華承印

孝友傳例見於唐書其他或稱孝義或稱孝行亦以所採微有異也今詮次爲孝友〔舊志〕

宋

王康臣靈山人父世賢病篤康臣與妻劉氏割股療之父病旣愈慶元二年郡守林公奏立旌孝坊以表之崇祀忠孝祠

按割股一事乃過禮之孝已奉功令禁止懼其相率成風也唯王久已崇祀謹從舊志採錄後之覽者當思孝道甚大非一端可盡亦非一節不取則記所稱大孝中孝小孝宜各有以竭其力矣

明

李國華靈山特牛村人嘉靖辛酉隨父往村糶穀返至博嶺山中遇賊傷其父華痛憤持刀赴鬪以死年二十七崇祀忠孝祠

孫佐性行至孝萬歷十四年鄉耆兩學公舉勘詳按院汪給匾賜金堅不受

清

容廣賢邑廩生幼失怙事母孝親喪三年蓆藁枕塊清素自茹未嘗肉食處兄弟極友愛縣令杜兆觀儒學蘇璋玉舉其德行